



Pressemitteilung

40 Joer SIGI: d'FGFC gratuléiert op hir Aart a Weis

Zemools den öffentlichen Déngscht muss net nëmme mat der digitaler Entwécklung mathalen - e soll souguer Virreider sinn.

D'FGFC ass fir e Centre des technologies du secteur communal (CTC) deen:

- eng eenheetlech kommunal Informatikinfrastruktur op Basis vun existéierende Produkter opbaut, déi sech op kléng- mëttel- a grouss Gemengen adaptéiert;
- e Service Développement a Maintenance an Eegeregie garantéiert a keen Outsourcing bedreift;
- de spezifische Besoinen am Gemengesektor Rechnung dréit, an déi kommunal Informatiksservicer beim Développement begleet;
- e performanten Austausch vun allen Donnéeën tëschent Gemengesektor, Ministère an aneren öffentlichen Institutionen garantéiert - dat an enker Collaboratioun mat CTIE
- d'Personal ënnert dem Statut vum Fonctionnaire communal astellt;
- engem externe Kontrollorgan, zemools betreffend Finanzen, ënnerstallt ass.

Vu dass all Members-Gemeng pro Bierger eng substanzuell finanziell Participatioun un de SIGI bezuele muss, sief d'Fro erlaabt, ob d'Ausrichtung vum SIGI deenen haitegen Ufuerderunge gerecht gëtt an ob all déi Ausgabe gerechtfäerdigt sinn?

Bal all Gemeng a Gemengesyndikat ass zwar Member am SIGI, komescherweis, ginn awer ëmmer méi kommunal Patronen an der Informatik ganz aner an eege Weeër. Et kann aus Sicht vun der FGFC net sinn, dass duerch d'Inkompetenz vun der SIGI-Féierung um laangen Enn all kommunale Patron verschidden informatesch Developpementer huet.

Eist Personal muss mat Programmer schaffen, déi weder deenen haitege Besoine gerecht ginn, nach fir déi et eng reaktionsschnell a kompetent Maintenance gëtt. Mir sinn dann no 40 Joer am digitalen Steenzäitalter ukomm!

De SIGI verkeeft elo säin « Nova » als Wonnerprodukt, fir all déi jorelaang bekannte Problemer ze léisen, onofhängeg vun internationale Lizenzen, Open source, multifunktionnell... Wier do net d'Rumeur, dass ausser enger faarweger Presentatioun, vill Receptiounen an e puer Simulatiounen, d'Weltneiheet « Made in Luxembourg » wäit ewech vu produktionsräif ass. Leit vum Fach bezeechen den « Nova » als eng deier Kopie vu Microsoft-Produkter a kritiséieren, dass d'Cotisatioun pro Bierger, primär duerch d'Entwécklung vum "Nova", konstant an d'Luucht geet. Interessant gëtt et spéitstens 2025, dee Moment wou d'Basislizenze fir déi jëtzeg Programmer definitiv gekënnegt sinn - dann ass et entweder « reboot » oder « crash »...

Wien kontrolléiert all déi Milliouneninvestier an Entwécklungen, déi vun der Allgemengheet gesponsert ginn? Wisou gëtt all externe Versuch, Finanztransparenz ze kréien am Keim erstéckt? Souguer huet een Gefill, dass déi politesch Verantwortlech vum SIGI net un deem Dossier interesséiert sinn.

D'FGFC steet zum Grondgedanken, dass et eng zentral Ulafstell gi muss, an daer déi spezifesch Besoine betreffend d'Informatik, eenheetlech am Gemengesektor developéiert a koordinéiert musse ginn.

An deem Sënn wënsche mir dem SIGI alles Guddes fir säi Gebuertsdag.

Matgedeelt vum FGFC Bureau exécutif élargi

Kontakt:
Claude Reuter / Vice-President
+352 40772066